

Robert, auquel advint la seigneurie de Joz sur Tarrare, et Loys qui demeura seigneur d'Alloignei. La fille fut nommee dame Blanche de Beaujeu, laquelle fut mariee avec le seigneur de Lunyeres nomme (Mabrian).

Guichard-le-Grand, pere de tous lesdits enfans pour sa tres grande prudence, sapience, discretion et fidelité, avec plusieurs autres dons de grace. Aussi pour sa vertu, force et audace, avec bonne conduite, fut toute sa vie en grace des rois de France et de l'estroict conseil d'iceulx, car il fut gouverneur de cinq rois. Premièrement de Philippe le Bel, lequel il gouverna et conduict en ses affaires son temps durant. Ledit roy Philippe le Bel eust trois enfans : le premier fut nommé Loys Huttin, qui fut roi de Navarre, vivant son pere, et apres le trespas de sondit pere fut faict roy de France; le deuxieme, Philippe le Long, et fut conte de Champagne et de Pontieux. Et apres ce que ledit roy de Navarre son frere, qui estoit roy de France, fut mort sans enfans masles, ledit Philippe le Long succeda comme plus prochain a la couronne de France et fut sacre a Reims. Le tiers desdits enfans dudit Philippe le Bel fut appele Charles le Bel, qui fut conte de la Marche. Et apres la mort de son frere, Philippe le Long fut roy de France. Et moururent tous les trois rois derniers nommez sans hoirs masles descendants de leurs corps. Par quoi apres leur trespas advint la couronne de France a Philippe de Valloys, filz de Charles de Valloys, qui estoit frere dudit Philippe le Bel et fut faict roy de France. Desdits cinq roys de France dessus nommez fut seigneur chambellan et grand gouverneur, tres feal serviteur et en toutes leurs terres, guerres, batailles et affaires, tres prudent et saige conducteur et diligent executeur. Et en tant que son temps durant ne se trouva homme qui luy fait peur ny duquel il ne prins vengeance en son honneur gardant et le prouffit du roy et du royaume et fut moult ayme et prise de tous, et aussy chevaleusement se pourta de son